



KEMENTERIAN PEMBANGUNAN
USAHAWAN DAN KOPERASI

SIARAN MEDIA

AGensi KUSKOP SALUR HAMPIR RM200,000 SUMBANGAN CSR KEPADA MANGSA BENCANA DI SABAH - EWON

PENAMPANG, 19 September – Tujuh agensi di bawah Kementerian Pembangunan Usahawan dan Koperasi (KUSKOP) menyalurkan sumbangan tanggungjawab sosial korporat (CSR) bernilai hampir RM200,000 kepada mangsa banjir dan tanah runtuh di Sabah.

Menterinya, Datuk Ewon Benedick berkata, sumbangan berupa bakul makanan, ubat-ubatan serta keperluan harian lain seperti lampin pakai buang telah mula diagihkan kepada penerima di Penampang, Kadamaian dan Papar.

“Sebahagian lagi akan disampaikan hari ini dan seterusnya secara berfasa sehingga semua sumbangan selesai diagihkan kepada 1,907 penerima,” katanya, di sini, hari ini.

Ewon berkata, sumbangan itu melibatkan TEKUN Nasional, Bank Rakyat, Suruhanjaya Koperasi Malaysia (SKM), Institut Keusahawanan Negara (INSKEN), Institut Koperasi Malaysia (IKMa), SME Bank dan Perbadanan Nasional Berhad (PERNAS).

“Sumbangan ini mencerminkan keprihatinan agensi-agensi KUSKOP dalam membantu meringankan beban rakyat yang terkesan akibat musibah banjir dan tanah runtuh baru-baru ini.

“Saya hargai inisiatif dan keprihatinan semua agensi di bawah KUSKOP yang melaksanakan program tanggungjawab sosial di Sabah,” katanya.

Ewon berkata, TEKUN Nasional menyalurkan bantuan kepada 500 keluarga di Penampang dan Papar serta kepada usahawan-usahawan TEKUN yang terkesan dengan bencana melibatkan dana sebanyak RM50,000, manakala SKM pula menyumbang 400 bakul makanan di Penampang dan 160 bakul makanan di Kadamaian bernilai RM56,000.

Bank Rakyat menyediakan 400 bakul makanan bernilai RM40,000 yang diagihkan hari ini di Penampang dan SME Bank sebanyak 200 bakul makanan bernilai RM20,000 di Penampang.

INSKEN turut menyalurkan sumbangan CSR bernilai RM10,000 kepada 127 keluarga mangsa banjir di Penampang, sementara IKMa menyampaikan 170 bakul makanan bernilai RM17,000 di Penampang dan Kadamaian.

Selain itu, PERNAS juga akan menyalurkan 100 bakul makanan bernilai RM10,000 kepada mangsa terjejas.

KEMENTERIAN PEMBANGUNAN USAHAWAN DAN KOPERASI
19 September 2025